

ZEMIS

Ñeti garosikao

Zemis ñeti epovoz ñeti kapot ev. Met aban Zemis pop pi Iesuz bosip ok, pi Zerusalem zeï ahö potak Iesuz añaraboz aban korav ahop ravat hehan Zuda pim modari Iesuz homeo badae batat hehaek mod nari kakamao metoohan parum zeï kapot betet rap rezat zeï modasikaroh sat añarab Iesuz hom namee hehariz ñaravatak hehan, Zemis paru pori boi tat het Iesuz nonoroh am tin tovai sohopanez, ma paru añarab modari tin masak methopanez homet, ñeti epov menat paruhaz meeh.

Met Iesu ñomat hasahan krismasañ 20-z zut bon hatahan tokat pi Zuda pimeriz homet ñeti epov menah.

Aban Zemis ñeti epov menah

1 ¹Met ne Zemis, Godir darim Amip Iesu Kristoz gog abanap ari Israel añarab tairari arim zeï kapot betegipuh, rapat main main ravat zeisikaro poek kaek sat hezari tin hepekez homet ñeti epov ev menomaz toh.

Honoñai nañ ou ravapanen tookazat

²Nem bosir sau ravat hezari, met ari Iesuz homeo badae batat hezaek, honoñai povor kao ari honep honeputi ou ravohopanen, lopori hori ravotunei, oñ am biñ ravat hezei. ³⁻⁴Met ari Godiz homeo tin badae batat hepekez hat honoñai povor kao ariti ou ravohopanen, biñ ravovai ari am rez kek tat tin tovai sohopek, povoz arim hepekezao tinaharam ravohopanen ari nañodoti, ma hodad tin navoz ari teki natoti.

God hodad tinao anohopan

⁵Met ni nap hodad tinavoz teki tekepuh Godin bar mañeken, pi masakavonañap, povoz nim hakezavoz kaev naravoti, oñ hodadeo nanat neñizohopanez pi zait tat hez. ⁶Oñ ni nap pot nat am lop houlorizarinañ het, Rotap God ne hodadeo nanapan ma nananoti, pot homekepuh, Godin mañeken rekot homet hakez poi ni nananoti. Met aban nap lop

houlorizaronañ hepenez pop pi teptepivok zi taeñ basat em tamahavoz zut het, 7-8 pim hodadeo in balavī tat hepanezaek, pi Godin mañapanen rekot hodadeo namanotū, ma nao namañairotū.

Moniñ bonorir moniñinañariz ñetiv

⁹Met arihanañ ni tairap Godiz homeo badae batat hekezap nonair nai ahoam bon hekë, povoz ni biñ ravat, God pi nemaz korav ravat hezan ne tin ev hez, pot homekë. ¹⁰Met arihanañ ni mod tairap Godiz homeo badae batat het hamarrah nonair nai ahoam bat sookezap potuz ni homet biñ naravotū, oñ epat homekë, Ne aban betezap ev, God nenap pi tinap hez, pot homevai sohoz. Met zibut lul ñodat ñu ravamahavoz zut ni ñomekë. ¹¹Met zibuñ petev berat mavat hezan gitap kez mañamahan arō ravamahapuh lul ñodat ñu ravamahavoz zut, aban monir zeirurumanañari monī modañ bapanez gogot tohopanepuh ñomapan.

God tin nenaō etamah-ñetiv

¹²Met honoñai povor kao naputī ou ravapan, ma pi horī nao tapanez moreg metapanen, pi horī pov ritou metat rez kek tat tovai sohopenezap biñ ravat hepan. Tapanen tokat God hañ tin pohao het hepenez au hahan hez-pov pi manapan. ¹³Met napuz loporih horī nao tapanez zaitiv ahō ravapan, povoz pi epat, “Godihō horī epov tomaz neen nañah,” pot hapane? Evo, oñ God tinaharam hezaek, pi rekot horī nao tapanez nonor bon, povoz pi aban popun horī pov tapanez namañotū. ¹⁴Oñ horī tamegivoz kapot tair hez? Met napuz loporih horī nao tapanez homet gihov mot meamahan zait pov ahō ravamah. ¹⁵Tamahan ñarop pim nonopuz loporih pohao nakez, oñ berevamah-povoz zut pim loporih horī homeamah-pov ou ravamahan am tamah. Met pop horī povor kao am tovai sohopenen, pim loporih horī povoharam an pap manapanen tokat ñomat horī ravapan.

¹⁶Nem bosir sau, God horiv takaz darin naañotug, ganō ari hometunei. ¹⁷Met ev hamarrah al tezat kutur manat tamahan eteamegivoz zut, God het narah darimaz zait tamah, met mod narah darimaz kaev ravamah bon, oñ pi alizavonañ het non tinaorohar añañirohot darimaz korav ravat het tin povor kao anohot hez. ¹⁸Met Godihō pim zaitivok hodadeo anahan dari pim ñetī rotap tinao hatevetegipuh, loporizaro borourat pimaz homeo badae bategin, pim ñaro garosikari ba avatahan het dari pim matut tahan hez-mapotuz koravori ravat hez.

Darim ñetiv baval haokaz modao

¹⁹Nem bosir sau, ñetī mod epov añoman hatevetet hodad ravei. Met mod nap ñetiv hapanen zuam hañiv mañotunei, oñ had gaa tat tinam hatevetet hometahoh hazei, ma avī navotaram modari hapanez ma

tapanezavoz zuam mogao totunei. ²⁰Met aban nap mogao tapan, povoz God etepanen pim añahan hezao baval hat pi tin tovai nasotü. ²¹Met avas ñedet tinam korav ravat het nonos urovai samegivoz zut, hori tairao arim loporizaroh het arim hepekezao bahori avatamah-potü pohao betet Godiz ñeti tinao arim loporizaroh bituz zut ñedeamahaek hatevetet, arim heriñ bat hor batat ñeti rotap pov baval hahopeken arim loporizaroh ahö ravat batin avatohopan.

²²Met Godiz ñeti tinao hat kovë nenañinañ hatevethopek, povoz moregao ravohopan. Oñ hatevetet, arim loporizaroh bizat baval hahopekezaek tin ravohopan. ²³Met nap Godiz ñeti tinao hatevetet baval nak tohopenezapuz tairavoti zu tat haoman hodad ravepek? Met aban nap pim herisin oreresik etet, ²⁴“Du tahag, ivoh betem,” pot hat du povoz zuam unun manat ivoh navet tamahavoz zut, hamoh-pop pi Godiz ñeti tinao hatevetet unun manat baval nak hepan. ²⁵Met Iesuz ñetiv hateveteameg-pov honoñai nao naet, oñ tin etamahao ok. Povoz aban tairap ñeti povon hatevetet loporih bizat homevai sohot, unun naman het rez kek tat baval hat tohopenez pop God tin metohopenen biñavonañ het tovai sohopan.

²⁶Met aban nap, “Ne Godiz nonoroh samohop ev,” pot hapanez pop pi tin pim gizasiz korav naketü, oñ modarin ser mañovai ñeti horiv haovai sohopan, povoz pim Godiz pot hapanez pov rotap naravotü, oñ betez tiu tiu ravat hepan. ²⁷Met dari Godiz nonoroh sovai tair tohokan God darim Papap etehopenen tin ravohopan? Met ñaro ononameri paru nonor pap bon pori, ma añ hapurihol abuhol ñomapanen hori hepanezi porin etet zakep tat korav ravat masak metohok. Ma mod betez hepanezi horiv tohopenen dari parum tohopenezat natotü, oñ bahori avatapan hezavoz darim hekazavoz tin korav ravat hek. (Pot tokan God etehopenen tin ravohopan.)

Dari modariz zakep tat masak metook

2 ¹Met nem bosir sau ravat hezari, darim Amip Iesu Kristo alizavoz maupuz homeo badae batamegiri, aban abatavonañ monir zeirurumanañarin etet poriz zait tat aban betezarin etet kaev ravotunei. ²Met ari Godiz ñetiv hatevethopekez hat togü manohopekez porah aban nañariv, nap dimir giv redeo tin tat hepanezi, met modap dimir giv kelat hepanezi meet hepanezi, emat lokapanen, ³ari redeo tin tat hepanezi etet, “Erom ae, ev tin epek ni emat tout,” pot mañepekepuh aban horitü meet hepanezi popun etet giz meu metat, “Ni ok hamarrah sat tout,” ⁴pot an tat mañeppek, povoz home horivonañ okat arim modari baverat main main bavatepeken tin naravotü.

⁵Nem bosir sau, met epat añoman hatevetei. Godihö ev hamarrah monir zeirurum bon añarab ahovokaro pimeri ba ou bataan hez. Met paru

pori pimaz homeo badae batat hepanez pov an pap manat hepanen, pihar loporī manat het pim masakavoz roketak hepanez hat God au hakahan hez, ⁶oñ kar, ari nonair nai bon pori batiu tiu batameg. Met paru tairarihō ari bahorī etamah? Ma tairarihō ñevok evizapanez avat samah? Nonair nai bonorihō pot nat, oñ monisinañ tapurihō pot etamah. ⁷Met rotap ari Iesuz añarab ravat pim abatao haovai samegin, paru monisinañ tapurihō abat tin tapuvoz kaev ravat batiu tiu batamah. (*Povoz tairaiž ari monir zeirurumanañariz zait tat monis bonoriz kaev ravameg? Evo, pot tamegivoz tin bon.*)

⁸Met Baiñetinavoz Tepatak Godiz ñetī katē ahov epat menahan hez, “Nimauz homet zakep tat hezavoz zut, añarab modariz homet zakep tat tin metohoz.” Met Godiz ñetī katē pov hatevetet baval hahopek, povoz tin ravohopan. ⁹Oñ ari aban napuz kaev ravat aban modapuz tin metepek, povoz Godiz hahan hez-pov elat ritou tepekezaek, arim horiv ahō ravat hepan.

¹⁰Met nap Godiz ñetī kateñir ah ñe hahan hezañ baval haovai ñetī katē hon nar ma ah ñe hon nao elat ritou tapan, povoz ñetī kateñir ah ñe hahan hez-mapoñ elat hatahavoz zut ravapan. ¹¹Met God ah ñe nao epat hahan hez, “Ari tovai betez bogī totunei.” Met ah ñe modao amun epat hahan hez, “Modap men ñomotun.” Met ni nap napunañ bogī nat hekepuh nim mod nap men ñomekē, povoz Godiz ñetī kateñir ah ñe hahan hez-mapoñ elat ritou hateñ, pot ravapan.

¹²⁻¹³Met tokat God dari ñevok evizapanez porah, petev ev hamarrah het arim modariz zakep tat masak namet emameg-pori, Godihō hañ arimaz zakep naetotū, oñ ari modariz zakep tat masak metameg-pori Godihō hañ arimaz zakep tat masak etat hepanen tinam hepek. Pot pi hahan hez, povoz tin hepekez hat ev hamarrah home tinavonañ het arim modariz zakep tat masak metohopekez pim ñetī tin añah-pov baval haovai sohozei. Tohopeken God ñevok evizapanepuh, dari zakep etapanez hahan hez-povohō hañ horiv etapanez pov ritou metapanen ari tin hepek.

Godiz homet tookazao honeo hepan

¹⁴Nem bosir sau, met aban nap pim giz nenasinañ epat hapan, “Ne Godiz homeo badae batat hezap ev.” Met pot pi hat pim modari nameñiz tapan, ma gog tin nao nat hepan, povoz pim Godiz pot hapanezao rotap ravapane? Evo, rotap naravotū, povoz pim Godiz hapanez povohō rekot Godizap pi banavatotū. ¹⁵Met nim naner bos ma teter sau nap gipizor dimir giv bon hepanepuh, ¹⁶ni meñizekē hat nihaz emapanen epat mañekē, “Ni nimauz zeimakeh maot sat itiñad mañarat ñarohot tinam hez.” Pot mañekepuh zakep tat gipiz ma dimir giv naman teken, pot piin mañekez pov tin ravapane? Evo, tin naravotū. ¹⁷Met povoz zut ni giz nenasinañ, “Ne Godiz homeo badae batat hezap ev,” pot hat modari tin

namet tooken, God niin etehopenan nim hakez pov, aban nap emiv bon tamahan ñomamahavoz zut ravat hepan.

¹⁸Met ñeti menoh-epovoz ni nap hatevetet epat hakë, “Evo, met nari Iesuz homeo badae batat hez, oñ mod nari tin tovai sohopenezavoz homeamah.” Met ni pot hakezapun ne hañiv niin epat nañom, Met paru tairari, “Dei Iesuz homeo badae batat hez,” pot hat parum modari tin namet hez-poriz, “Rotap paru Iesuz homeo badae batat hezari ok,” pot parumaz rekot haoma? Ma tair tat paru modari tin namet hezaek, parum hamah-pov barotap batom? Evo, ne rekot barotap navatotü. Oñ ne Iesuz homeo badae batamohoeok, nem modari tin metamohon paru nem pot metamohovon etet rekot nemaz, “Rotap pi Iesuz homeo badae batat hezap ok,” pot hapan. ¹⁹Met ni, “Rotap God ahö nenap hakez,” hameñi? Pov tin ok, oñ paru pituhol amun, “God modari ritou metat ahop hez,” pot hamahaek paru tin tovai samaha? Evo, pot bon, oñ God ahö popuz homet ñaihet tat paru dei dei tamah. ²⁰Met ni kutap, ñeti tairao nañoman nim, “Ne Godiz homeo badae batat hezap ev,” pot hat nim modari tin namet hezaek, nim hameñ-pov betezao ravat hez, pot ni hodad ravekë?

²¹Met ñeti garos menohovoz epov nañoman hatevetet hodad ravekë. Met darim mimip Abraam tair tahan God etehan pi tinap ravah? Met Godihö Abraamin pim rop Aisak bareñ elapanez mañahan pi ñeo baval hat pim rop hel arusik bizat en kaizasinañ bareñ elapanez tahaek pi Godiz etañik tinap ravah. ²²Met ñeti epovoz kapotaz hodad raveg, ma narav? Met Abraam Godiz homeo badae batah-pov, met Godihö piin mañahat tah-pov honeo ravahan pim, “Ne Godiz homeo badae batat hezap ev,” pot haohavoz rotapuv ou ravah. ²³Met Godiz Baiñetinavoz Tepatak mamog Abraamiz ñetiv epat menahan hez, Abraam pi Godiz homeo badae batat hehan God pimaz epat hah, “Pi aban tin tamahap ok,” pot menahan hez. Met añarab modari pimaz pot haoh, “Abraam pi Godiz ñod pimaup ravat hez.” ²⁴Povoz Abraamiz pot tahavoz homet epat hodad ravei. Aban nap betezam, “Ne Godiz homeo badae batat hezap ev,” pot hapanezap Godiz etañik pim moreg hapanez povoz tinap naravotü, oñ tairap pimaz tin homeo badae batat pim hahan hezat baval hat tovai sohopenezap pim etañik tinap, pot ravat hepan.

²⁵Met mod naputü zut tat epat amun haom. Met añ napuz abatao Reap pop pi abanarinañ betez bogi toohap ok, met narah Zuda aban nañariv kilam Kenan zeisin etevai sohot añ popuz zeimakeh lokahan ba iz batahan hehan, kutur ravahan non mod pataoroti meehan tinam sah, povoz God pim tah-povon etet, “Añ tin tamahap ok,” pot hah. ²⁶Met napuz emiv bon tamahan pim heris ñomamah, povoz zut nap Godiz homeo badae batat hepanepuh pim tin tohopanez nañ honeo ou narav tapanen pim Godiz homeo badae batat hepane pov, emiv bon tamahan ñomamahavoz zut ravat hepan.

Darim gizañik tañañiz korav tin hek

3 ¹Nem bosir sau, met arihanañ honep honep bal haz rouvat Godiz ñetiv añarabon mañohopan. Met dei pim ñeti pov mañamegit God et ba emeet hezaek, piuhö ñevok evizapanezarah dari añarab maporin etet an etapanepuh dei pim gog pot tamegiriti hori tairao hepanezavoz hañiv ahoam etapan. Povož ari mapori gog pov tohopekez hometunei.

²Met dari añarab hori povor kao tovai ñeti horiñ haovai sameg, oñ aban tairap pim gizasiz tin korav het ñeti horiv nak hepanez pop, rotap pi aban tinap ok het pim hepanezavoz tin korav ravat hepan. ³Met aban nap bol os napuh helat nonoroh tin sapan hat, os popuz agolasik ain goe nas birep bamanahan hez-pos bizat beri hamahan, osip hatevetet aban popuz zaitivok beri hamahati samah. ⁴Ma sip ahomakez amun tamahavoz homei. Met teptepiv uramahan sipimak iv havevok basat em tamahan pomakez aban koravop kohat hezaek, pi pei goe irih hezas bahavoe tamahan sip ahomak havoe tat pim homet bavatamah-povoti samah. ⁵Povož zut darim gizañik tañañ goeñ hez, oñ hori nao hamegin hori pov zuam ahö ravamah.

Met utar napel tamahan aban nap itiñad bat samahan, it ñinio el ñodat aviam ñadovai samahapuh, rai rai hat ñadat ahö ravat hovisir nonair nai mapotü map bahori batamah. ⁶Met povož zut darim gizañik tañañ goeñ hez, oñ tañ goe poñinañ ñeti horiv hamegin hori pov ahö ravovai samahan, it ñinio ñodat ñadamahapuh map bahori batamahavoz zut, Seten darim loporizaroh bahori etovai darim tin hekazao map bahori avatamah.

⁷Met dari añarab anumai mapori, idehol ma emahol ma hamalehol ma iv havevok hezari bat, basok batamegin sok ravamah. ⁸Met povož zut dari añarabohö rekot darim tañañ basok navatotü, oñ hamal lam horiv hez-nap emenamahan hori ravamegivož zut darim tañañihö modari bahori metamah. ⁹Met narah God darim Papapuz biñ ravat tañañinañ mañ mañameg, met mod narah zuam unun manat tañ tapuñinañ darim modari Godihö pim zutari matut tahan hezariz ñeti hori pekuñ hameg. ¹⁰Nem modari, Godiz ñeti biñao ma modariz ñeti pekuñ giz nenañikanañ berevat ou ravamahaek tin bon. ¹¹Met izoveri eramahaek, iv et peiri erapane? ¹²Ma avamedek tiompot uloñ badapane? Ma begirih guž uloi erapane? Evo, pot bon. Met iv havè guavetanañavok iv tin nakazao naholotug, tairaz ari giz tapuñinañ ñeti horiñir tinañ hameg? Evo, pov tin bon.

Hodad tinavor horivož ñetiv

¹³Met ari hodad tinavonañ hez, pot homeamegi? Povož arim hepekezavoz homet tin korav ravat arim heriñ bat hel batotunei, oñ bat

hor batat masakavonañ tin tovai sohopek. ¹⁴Met ni nap lop horirinañ het modariz kaev ravat mogao tat gitait ravekepuh nim heris bat hel batat hekepuh, “Ne hodad tinavonañap ev,” pot haken nim ñeti hakez pov moreg ravapanezao ok. ¹⁵Met ni nap pot tookezaek Godihö ni hodad pov nananotü, oñ Setenihö ham herisiz hodad pov nanapanen pim gizarop baval hat ni pot tovai sookë. ¹⁶Met añarab tairari parum heriñ bat hel batat mogaovor gitaitiv ahö tamah, ma añarab modariz kaev ravat bat hor batamahaek, parum hezao ginohan tamahan parum horivor ñaiv ahö map ravamah. ¹⁷Oñ dari Godiz hodad tinao añairamahekahar sohot tair tovai sohok? Met dari home tinavonañ sohot modariz kaev naravotü, ma lop masak tinarizaronañ het mogao natotü, ma modari hapanen tinam hatevetet baval hahok, ma modariz zakep tat moreg nametotü, oñ ñeti tin rotapuñiharam mañovai tin metovai sohok. ¹⁸Met adasik bitü ñedeamegin gipiz berevat ahö ravamah, povoz zut dari modari masak metovai mogao tapanezari ñe bar masakao mañat basok batovai sookan, darim loporizaroh masak tin rotap hekazao berevat ahö ravohopan.

Horiv tamegivoz kapot ev

4 ¹Met ari nae nap ser hameg, ma nae nap menameg-povoz kapot tair? Met nonair nai herisizatuz zait horiv arim loporizaroh ahö ravamahapuh zait tinao ritou metamahan, ari mogao tat zuam ser hameg, ma nae nap menameg. ²Met ni nap naiz etet zait tat nim bekez pap tameñ, ma nim modap mod nai bat hezan, ni etet zait tat nanapanez mañameñin bagiz gut tamahan, ni nag tat ser mañameñin poekanañ ari nae nap menamegin ñai ahov ou ravamah. Met ari nai bon het Godin mañ namañ tamegiek naan tamah. ³Ma ari nari God nai anapanez mañamegin bonaiz pi naan tamah? Met ari giz nenañinañ God pei poi anapanez mañameg, oñ arimauz zaitivok am sohopekez homet moreg hameg, povoz God naan tamah. ⁴Met arim tamegivoz tairavotü zut tat añom? Met añ nap pi modapuz abup givogì bamahavoz zut, ari Godiz añarab haravat hezaek maot hori tameg. Met paru tairari ham herisiz nonair naiz zaitivok tovai sohot pim non tinaorö beteamah-porin God etemahan pim kapotak bonori ravamahavoz ari hodad nata? ⁵Met Baiñetinavoz Tepatak epat menahan hez, God pim Pul Tinap dari anahan hezaek, dari Goditihar ravat het mañovai sookaz Pul Tinap zait tat hez. Met ñeti pov upai betez menahan hez, pot ari homeamegi? Evo, upai namen. ⁶Oñ rotap God dari horiv natotuz masakao ahoam anat eñizat hez. Met Baiñetinavoz Tepatak ñeti mod nao epat amun menahan hez, Met nap pimauz abatao bat hel batat hepanezap God pi kos rez manapan, oñ nap pimauz abatao bat hel navat hepanezap God rekot meñizat masakao manohopan. *Sindaun 3:34*

⁷Met ñeti ev menoh-epovoz tinam hatevetet Godiz irih ravat tin hepeken pi arim ahop ravat hepan. Tapanen Seten hori nao tepekez

moreg etohopanen kos rez manat, “Ni pataek sa,” pot mañohopeken pi zeï anat sohopan. ⁸Tapanen ari Godiz nakoe sa ravat pimaz homevai sohopeken, pi amun arim nakoe hepan. Met darim marañ ivov beteamegin tin ravamahavoz zut arim hori tameg-poñ, ma arim lop houlorizaronañ hez-poñ betet hodad tinavonañari ravat sohozei. ⁹Met petev arim hori tamegivoz biñ ravat hezari, hori potü betet ari ñomamahapuz iñir zakep tamegivoz zut, arim horivoz homet iñir zakep tovai, ¹⁰“Dei aban horiri ev,” pot hat Godiz irih emat hepeken, pi maot ari bat hel avatat eñizohopan.

Darim modariz ñe horiv nakaotü

¹¹Met nem bosir sau, arim modari an tat ñeti pekü pekü haotunei. Met arim modari an tat ñeti poñ hahopekezari, darim modariz zakep tookaz ñeti katë God hahan hez-pov elat ritou tepekezaek, ñeti katë pov betezao hahan hez, pot homepekezat ravapanen, ari Godiz ñeti poñ baval nak hepekezari ravat hepek. ¹²Met God pimauhö ñeti kateñir ah ñeñ hahan hez, povoz tokat pimauhö ñevok evizat dari añarab honep honepuz het tookazañ ba ou batat, an etat pimauhö ba everat nari kakamavok bizapan. Met ari Godiz zut ravat arimauhö arim modari an tat parumaz ñeti horiñ hamegivoz tin bon.

Tokat berevapazavoz dari hodad nat

¹³Met ñeti modao ev haoman hatevetei. Met narah ni nap pot hakë, “Petev ma zeirevai ne sat zeï natak krismas honeo het gog nao tohomapuh monis bohom.” ¹⁴Met pot hakezapun epat nañom, Zeirevai berevapanezavoz ni hodad heza? Evo, ni hodad nat. Met dari añaraboz hezao itoulov helat aviam het bon tamahavoz zut hezaek, dari ev hamarrah pohao nakez, oñ aviam het ñomameg. ¹⁵Povoz ari nap, “Ne potar pot tom,” pot haotunei, oñ ari tinam homet epat hahozei, “Met God darim Papapuhö hepan, povoz rekot dari ev biriri het gog potar kat tohok.” ¹⁶Oñ ari pot nak tamegipuh, arimauz abatañ bat hel batat arimauz tohopekezat hamegiek, hori ahov ou ravamah. ¹⁷Met ni nap het tin nao tekez homekepuh tin pov tekë, povoz tin ravapan, oñ ni tin pov nat hekë, povoz niiti horiv am hepan.

Monir zeirurumanañariz ñetiv

5 ¹Met ari monir zeirurumanañari hatevetei. Rotap hori povor kao ariti kakamavonañ ou ravapanez tah, povoz arimauz zakep tat ñaihetivonañ iñ hahot hezei. ²Met arim monir zeirurum bat hezatü zañ tovai samah, ma arim dimir giv tinatü ahoam biamegin hezaek, tibihol men elamah. ³Met God ñevok evizat dari an etapanezao totoi ravamah, oñ ari kut tat het arim moniñir nonair naitü am batogü manohot hez. Hatevetei, golivor silvao batogü manameg-poñ

girgir reamahaek, girgir reet hez-poñihö arim hepekez horiv ba ou batapanen itinadek ari ñadat hori ravepek. ⁴Met paru arim gogot tamahari moreg metat parum zumao ari naman tamegin, pori honoñai tat hezan God mod mapori ritou metat hez-pop parum in hamah-povon hatevetet hodad ravat hakezag etei. ⁵⁻⁶Ma paru aban tinari ari hañiv etapanez nonor bon pori, ari hori metat ñevok biameg, ma nari menameg. Rotap, met bolohol gipiz manamegin haleñai tamahavoz zut ari ev hamarah het arim zaitivok sohot arimauz heriñik tin metat gipiz muzetü novai dimir giv tinatü tohot ari biñ ravat hez. Oñ bolohol haleñai tamahan uramegivoz zut God tokat hañiv etat kakamao anat bahori avatapan.

Darim Amip erapanez etevai sook

⁷Nem bosir sau ravat hezari hatevetei. Met dari bitü adasik ñedeamegin hezan utar pelamahan ñekeñ berevamahan nonos urovai sohot tokat gipiz tinatü rapat utap tapanen bat dari nookaz hat het etevai samegivoz zut darim Amip tokat maot erapanez ari ñai bizat het etehot hezei.

⁸Rotap pi darim Amip maot erapanezao totoi ravah, povoz pim ñetiv arim loporizaroh bizat badae batohot kez tat tovai sohozei. ⁹Nem bosir sau, pi totoi erat dari ñevok evizapanez tahaek, ganö pi hañ horiv etapan hezavoz ari nae nari ñeti horiv haotunei.

¹⁰⁻¹¹Nem bosir sau, met batam propet abanari het toohavoz homei. Met pori darim Amipuz abatavonañ ñetiv haohan añarab modarihö bahori metooh. Toohan paru hañiv namet, oñ paru am tinam sooh-poriz epat hameg, “Met modariz bahori metoohan rez kek tat tinam tovai emoohari petev biñ ravat hez.” Pot parumaz hameg. Met parum pot tovai emooh-povoz zut ari hodadevonañ tinam het taput tovai sohozei. Met aban nap pim abatao Zop popuz het tovai sooh-ñetiv ari hat haveteg. Met honoñai povor kao piiti ou ravoohan pi am rez kek tat tovai emoohan, God etet masak metat maot batin mavatah-pov ari hodad. Met rotap God pi masakavonañ zakep tat tin etamah, pot haok.

Dari ñeti rotapuv haokaz ñetiv

¹²Nem bosir sau, ñeti ahö nao añoman hatevetei. Met ni nap modarin ñeti nao mañat paru nim ñeti pov barotap batapanez homet epat haotun, “Godiz taevavok rotapuvoam ne ev arin añamoh.” Ma, “Tuarih ne rotapuvoam ev hamoh,” pot haotun. Povoz ganö ni ev menohovoz zut nao haken God hañ horiv netapan hezavoz ni nao tekez homekë, povoz nim modarin, “Ne rotap tomazao ev hamoh,” pot mañ, ma ni nao natotuz, povoz parun, “Evo, ne natotü,” pot mañekë.

Mañ havai sookaz ñetiv

¹³Met ni nap niiti honoñai nao ou ravapanen, honoñai povoz homet mañ hahoz. Ma ni mod nap ni tin hekez nao niiti ou ravapan, povoz

Godiz biñ ravat pim abatavonañ daañ haovai sohoz. ¹⁴Met ni nap lamao tekë, povoz añarab Iesuz togutaz koravoriz asiv meeken sat mañapanen emapanepuh, Iesuz abatao haovai ueriv nim herisik ur neelat God batin navatapanez mañap. ¹⁵Met paru Godiz tin homeo badae batat mañapan, povoz God ni batin navatapan. Ma ni hori navonañ hekë, povoz pi pov baolat betepan. ¹⁶Povoz arim hori tepekezavoz ba iz batotunei, oñ nae nap mañohezei. Tat nae nap meñizat Godin tin hepekez mañ mañohepeken lamao bepekezarah batin avatohopan. Met aban nap Godinañ tin opepeam sohopenez pop mañ haovai sohopenen pim hahopenez pov kez ravat hepanen God hatevetet meñizohopan. ¹⁷Met batam Godiz propet aban nap Elaiza pi darim zut aban nenap het utar napelotuz Godin ahoam mañ mañoohan hatevetet hahan krismasañ 3 met modavoz ñonihol 6 utar napel het git kezao ravat heh. ¹⁸Tahan maot utar pelapanez Godin mañ mañahan utar pelahan avañik gipiz maot tin tah.

Darim modap bat em batakazat ev

¹⁹⁻²⁰Nem bosir sau, arihanañ nap ñeti rotapuv baval hat tovai sohopenezaek, maot kos rez manat non horioroh sohopenen ni tin sookezapuhö, Pi horiek sapan hez, pot homet maot Godiz ñetiv mañat non tinaoroti mañaireken maot sohopenezaek, God pim hori tohopenez poñ baol betepanen pi horiek nasotü, oñ Godizap ravat hepanez maot bavatekë.

(Zemisiz ñetiv menahat nen ev.)